

## Yesu - Mündü

### 1.1

Dene züka tofo ngü ka Me teka Yesu \*Kurisito, te di de Ye Me.

### 1.14-15

14 Fütanga ngü la, fü ewü azoro Yüwane, anü di agü agbü ku. Te Yesu je ngü la, fü ah ayia ace sü la, adu ka-ye agbü \*Galilaya. Fü ah angbü endoro da emala ngari Me fü wü kpara kpala, 15 gü ba dene, “Mere sïkpï koro eyi gbamari. Miri te Me tima teka aküwa wü ne, koro eyi. Te di bala, wü ce \*siti ngü ka-wü, de wü le to ngü ka Me de maguma wü biringbö.”

### 1.21-27

Dene ngü ka Yesu de wü siti wü di engä me

Luka 4:31-37

21 Gbü gara ra, fü wü Yesu ayia anü akoro agbü Kaparanama. Fü \*sïkpï ka Me amaka ewü kpala. Fü ewü ayia anü arï kpa \*esambü ka biti-te. Fü Yesu akpo da erï wü kpara kpala. 22 Fü riri kaka-na la ayia aga gbü jia wü kpara la afa sü. Wüh gü ba, “Riri ka komoko ne ka-ye kpikpi ye. Angü ah ngbü emala mere kpeke ngü, baka kpara te Me tima engu me-ye. Wü kpara ka-ani, te ewü ngbü erï ani de sene ne, wüh rï ani bala nda-wü de.”

23 Gara komoko ta ladü kpa esambü ka biti-te la, de \*siti wü di engä me guvu ye. Fü komoko la ayia akpo da eba rere kpa tikpi, gü ba, 24 “Yesu deyï, tima ka-ani gbü ngü ka-ye nda ma. Ye koro sene teka ne? Tekä amörö ani asidi? Ani wu ye kpo. Ye de züka kpara te Me tima ye me-ye füh kotö ne.” 25 Fü Yesu ayia amala ngü fü siti wü di engä me la, gü ba dene, “Yi nga anga, de yi koro guvu komoko la asidi!” 26 Fü siti wü di engä me la ayia agbü rü komoko la, agbo kötö, da eba rere. Fü ewü ayia ace komoko la, akpe, atafa ka-wü.

27 Dela ngü ta te Yesu mere, te engu liki siti wü di engä me di, guvu gara komoko asidi. Fü ngü la aga gbü jia wü kpara 'buru, baka mere ngü cucu. Fü ewü akpo da eyi-ta tete-wü, gü ba dene, “Apa! De bane ne ngü ne? Amba riri ka Yesu ne, ah ka-ye de kpeke riri fanü fanü. Angü ah ngbü eto riri fü siti wü di engä me, fü ewü angbü eje ngü kaka!”

### 1.32-34

32 Etamurago la, te ra ti tete na, fü mere bi wü kpara ayia aza wü mürü keke ka-wü, bete wü kpara te \*siti wü di engä me ngbü emere ewü ne, akoro de ewü kpaka Yesu. 33 Fü wü kpara gbü sü la aci abiti te-wü gbe gbe gbe kpa emöngiti ka kambü te Yesu di gbügbü na. 34 Fü Yesu ayia aküwa mere bi wü kpara de wü keke eküte wü la 'buru. Fü ah aliki \*siti wü di engä me guvu gara ewü asidi. Fü siti wü di engä me la angbü eku gba. Fü Yesu ayia atiri ewü. Kükürü de, angü wüh wu ta eyi, gü ba, Yesu ka-ye de kpara te Me tima engu me-ye füh kotö ne.

### 2.1-12

Dene ngü te Yesu küwa gara komoko te küküte kpi akpi 'buru

Matayo 9:1-8, Luka 5:17-26

1 Gbü gara sïkpï, fü wü Yesu ayia adu kpa eköti, agbü Kaparanama. Te wü kpara je nganga na, gü ba, Yesu du koro eyi kpa eköti ne, 2 fü mere bi wü kpara aci akoro abiti te-wü gbe, kpa esambü te Yesu ngbü gbügbü na ne. Fü sü ani kpa esambü 'buru yere. Fü gara wü kpara angbü nda-wü kpa etanü, ede möngiti. Fü Yesu angbü emala to ngari Me fü ewü.

3 Baka te Yesu ngbü la emala to ngari Me fü wü kpara la, fü ewü ayia akoro de gara komoko, te küküte kpi akpi 'buru. Wü kpara te ewü bi engu, wüh baka wü kpara bala. Fü ewü abi engu füh ka'da, de ani koro di kpaka Yesu, de ah küwa engu. 4 Te wüh koro kpala, fü ewü amaka mere bi wü kpara, te ewü ni sü emöngiti 'buru yere. Da ewü, te ewü ena ari kpa esambü de müri keke la, akoro di kpaka Yesu ne, nda ma. Te di bala, fü ewü ayia afa nga gara mani. Fü ewü ayia ali kpa tikpi, enzö kambü, afuru nzö kambü la mbiii te sü, te Yesu ngbü ero mö tete na ne. Fü ewü ai ku te ka'da ka müri keke la, abi engu di, ato te görö te ewü furu la ferrre, ao kötö engagira Yesu.

5 Te Yesu wu ngü la bala, fü ah awu, gü ba, wü kpara la to maguma wü eyi fü ni fanü fanü. Fü ngü la areke gbü jija na afa sü. Fü ah ayia amala ngü fü müri keke la, gü ba dene, "Enga ra, \*siti ngü ka-mü ta te mü mere gbü jia Me ne, ma za gbü nzö mü eyi asidi."

6 Gara wü \*müri riri ta kpah ladü kpala. Te wüh je ngü te Yesu mala fü komoko la bala, fü ewü angbü efi nga ngü emaguma wü, 7 gü ba dene, "Dene ne töndö ngü ne? Yesu yia efü te-ye ba Me? Angü kpara füh kotö ne, te ti aza siti ngü gbü nzö wü kpara, ah ngbüri ladü? Ah nda ma! 'Duwa Me te ngbü eza siti ngü ka wü kpara me-ye."

8 Amba Yesu wu fingängü ka-ewü la eyi. Fü ah ayia ayi-ta ewü, gü ba dene, "Yi ngbü efi nga ngü la emaguma yi bala, neh teka ne? 9-10 Yi wu de, gü ba, ma de \*Ye Kpara ka Kpi? Te di bala, wazi ra ladü, teka adi eza siti ngü ka wü kpara füh kotö ne, gbü nzö ewü di asidi. Yi fi nda-yi, gü ba, ma mala töndö ngü kükürü? Yi ena awu ngü la enatikine." Fü Yesu adu afü te-ye, amala ngü fü müri keke la, gü ba dene, 11 "De-ye deyü, ye yia eyia, ye za darara ka-ye, ye go kpa eköti." 12 Fü müri keke la ayia 'duwa cukuru, gbü jia wü kpara 'buru, arü atikpi. Fü ah aza darara ka-ye, ayia ago di agba ye.

Dela ngü ta te Yesu mere, te engu küwa komoko, te küküte na kpi akpi ne. Fü ngü la aga gbü jia wü kpara la afa 'duwa sü. Fü ewü aci 'buru, agbo nga iri Me, gü ba, "Ani wu ngü de bala gügü la de!"

4.35-41

Dene ngü te Yesu tata mere wege di

Matayo 8:23-27, Luka 8:22-25

35 Gbü ra la, etamurago, fü Yesu ayia amala ngü fü wü kpara ka-ye, gü ba dene, "Ani nü enü kpa etangu." 36 Fü wü \*kpara ka Yesu ayia ali gbü \*zabu, te engu di gbügbü na. Fü ewü anü sü ka-wü, yo! ace mere bi wü kpara la kpa füh gumba kpala. Wü gara zabu ngbü ta kpah enü kpala. 37 Wüh te ekoro kpa etü mere ngu \*Galilaya la, fü mere wege ayia akpo angbü efe jia ngu la de wazi. Fü zabu angbü eyiki, da efüfü te-ye, ekolo ngu gbü ye. Fü ngu angbü esi gbü zabu la. Zabu la yia ta ebu ewü abu agbü ngu.

38 Yesu, mü ngbü ka-mü gbü zabu to kpa sisi kpala, era ka-mü ara, o nzö mü ga füh bongo. Fü wü kpara kaka akoro azükü engu, gü ba dene, "Mere kpara! Mere kpara! Ani te ekpi! Ani te ekpi! Te ani kpi la, ngü ena asiti te-ye de?" 39 Fü Yesu ayia azükü. Fü ah adu arü amala ngü fü wege, gü ba, "Wege, mü nga enga! Ngu, mü ngbü ziii." Fü wege ayia anga. Fü ngu ayia angbü ziii. Fü sü ayia anga 'duwa ngbiii.

40 Fü Yesu adu arü amala ngü fü wü kpara ka-ye, gü ba dene, "Yi ekpe neh cürü ne? Yi to maguma yi fere mbi mbi la de? Ah le de yi to maguma yi fere." 41 Fü cürü ari te ewü afa sü, teka ngü ka wazi ka Yesu la. Fü ewü angbü da eyi-ta tete-wü, gü ba dene, "Apa! De bane neh ene ngü ne? Kpara ladü füh

kotö ne, te ti amala ngü fü wege bete mere ngu, fü ewü aje riri kaka-na baka e la?”

Dela ngü ta te Yesu mere, te engu to riri fü mere wege tete.

#### 5.22-24

22 Gara komoko ta ladü kpala de iri ye Yayirü. Engu ta de mere kpara te ngbü emere tima kpa \*esambü ka biti-te. Te Yayirü wu Yesu tete, fü engu ayia akoro, atı eri lö Yesu, 23 anda'ba te-ye fefe, gü ba dene, “Mere kpara deyı, ye koro, ye küwa ye ni, mba jaji würıse, angü keke ngbü emere engu efa sü. Ah yia eyi ekpi akpi. Ye koro la, de ye o kpa ye eküküte na, de ah küwa.” 24 Te Yesu je ngü la, fü ewü ayia anü de wü Yayirü. Fü mere bi wü kpara aci anü kpah gbü nga ewü, enzınzi te-wü, da ededere Yesu.

#### 5.35-42

35 Baka te Yesu ngbü emala ngü fü würıse la, fü wü kpara gba Yayirü, te mbarase kaka ngbü eke ake ne, akpe akoro. Fü ewü amala ngü fü Yayirü, gü ba dene, “Yayirü deyı, ah nza eyi. Ye mere e ambü mere kpara la tıne de, angü mbarase ka-ye ne kpi eyi.” 36 Amba Yesu, mü le ngü ka-ewü la nda-mü de. Fü mü adu amala ngü fü Yayirü, gü ba dene, “Yayirü deyı, ye kpe cürü de. Ye to maguma ye fü ni.”

37 Fü wü Yesu ayia de wü Petero, \*Yakobo bete \*Yüwane, anü kpa gba Yayirü. Fü ewü ace mere bi wü kpara la sidi nga wü, angü Yesu le de bi wü kpara la nü fa nga ni kpala tıne de. 38 Te wüh nü koro agba Yayirü, fü ewü amaka mere bi wü kpara kpala, da eku mere siti gba, de wü yiyi. Dela gba nda tıne de! 39 Fü Yesu adu arü amala ngü fü wü kpara la, gü ba dene, “Wü ngbü eku gba neh teka ne? Mbarase la kpi akpi nda de. Ah ngbü era ka-ye ara.” 40 Fü ewü aci 'buru angbü emü engu, gü ba, “Dene ne töndö ngü ne?” Fü Yesu ayia aliki ewü 'buru etanı, aza 'duwa wö ye mbarase, ake ni ye na, bete wü Petero de wü bu ye, te ewü koro de ewü ne. Fü ewü ayia arı te sü, te wüh o kö mbarase la tete. 41 Te wüh koro kpa esambü la, fü ewü ayia awu kö mbarase. Fü Yesu ato kpa ye, azoro kpa mbarase di, ai mbarase la, amala ngü fefe gbü ngü mündü ka-wü, gü ba, “Talita gumi!” Ah ba e te ewü gü ba dene, “Jaji würıse deyı, ye yia eyia tikpi.” 42-43 Fü jaji würıse la azükü, ayia cukuru atikpi da endoro. Angü mbarase la, re kaka-na koro eyi nzükpa de füh ye 'basu. Fü Yesu amala ngü fü ewü, gü ba dene, “Wü mere e amala nga ngü la fü wü bu wü fa fa fa de.” Fü ah adu amala ngü fü wü wö ye mbarase la, ake ni ye na, gü ba, “Wü mere kümü, wü to fü mbarase la.”

Dela ngü ta te Yesu küwa ye Yayirü di. Fü ngü la aga gbü jia wü kpara afa sü.

#### 7.18-23

18 Yesu gü ba dene, “Yi kpah bala? Yi je si-ngü la nda-yi kpah de? Zü-e te mü ezü, ah ena asiti mü gbü jia Me, neh baye baye? 19 Angü zü-e nü kpa emaguma mü nda de. Ah enü ka-ye kpa gbü nza mü, anü sü ka-ye agbü gü.” Ngü te Yesu mala la, ah baka e te engu gü ba, zü-e te kpara ezü, ah 'buru mbi gbü jia Me. 20 Fü Yesu agü ba, “Ngü te ena asiti mü gbü jia Me, ah de siti ngü, te mü ngbü efi emaguma mü. 21-22 Angü te kpara ngbü de siti fingangü emaguma ye la, wü ngü te engu ena angbü emere ne, ah ena adi kpah 'buru de siti wü ngü. Ah ena amere yala, ah ena afiti wara kiri ye, ah ena amere waza. Gara ena ati ngü guvu ye, asoko kpara, amörö kpara. Gara ena akpi gümü e, amere zü, azi e ka kiri ye. Gara ena acu ngü ye, afiti kiri ye de mani, emere wü gara töndö ngü, te Me le de. 23 Wü kpara 'buru ngbü emere wü ngü de bala, ah teka siti ngü te di emaguma ewü. Dela wü ngü te ena asiti mü gbü jia Me me-ye.”

#### 9.2-8

Dene ngü ka küte Yesu te fü te-ye

Matayo 17:1-13, Luka 9:28-36

2 Fütanga sīkpī ma'diya, fü Yesu ayia aza wü Petero, \*Yakobo, bete \*Yüwane. Fü ewü anü akoro kpa enzö mere rüvü. Te wüh koro kpala, fü küte Yesu akpo da efü te-ye, da ecī acī gbü jia ewü. 3 Fü bongo kaka-na avi kpah avi kpīlīlī, angbü da ecī acī baka ra. Kpara te ena azürü bongo, avi akoro di bala, ah nda ma. 4 Wüh te eceka kpī bane de, gbo! te wü kpara 'basu. Ah de wü \*İliya ake \*Müse, diri wü kpara ka Me ta gügü ne. Fü Yesu angbü da ero mö de ewü. 5-6 Fü mere cürü ayia arī te wü Petero. Fü fingängü ka-wü akpo da endoro 'daaa. Fü Petero ayia amala ngü fü Yesu, gü ba dene, "Mere kpara, sü de sene, ah reke gbü jia ni fa sü. Ah tī ta fü ani angbü sene. Te di bala, ani ena ajī wü gugu bata, nda-ye biringbö, nda Müse biringbö, nda İliya kpah biringbö." Ah mala ngü la bala, angü ah wu züka ngü, te engu ena amala ne, nda de. 7 Petero bü te emala ngü la, fü sangu ayia akoro, agba ewü 'buru. Fü ri Me awü gbü sangu la, gü ba dene, "Dene zu Ye ra, te maguma ra le engu fa sü. Yi di eje 'duwa riri kaka-na." 8 Wüh te eceka kpī bane de, yirri! Wü Müse ake İliya nda-wü tīne ma! Yesu ka-ye bü eyi kpikpi ye.

12.28-31

Dene ngü ta te Yesu mala teka kpeke Riri ka Me

Matayo 22:34-40

28 Gara \*mürü riri ngbü ta eje yiki te wü \*Saduke ngbü ega de wü Yesu ne. Te engu je ngü te Yesu lügü fü ewü la, fü ngü la areke gbü jijia na afa sü. Fü mürü riri la adu ayi-ta Yesu, gü ba dene, "Mere kpara deyī, nda-ni yitängü kpah ladü. Esüka wü \*Riri ka Me 'buru, kpeke riri, te fa wü bu ye 'buru, neh engu deyī?" 29 Yesu gü ba, "Kpeke Riri te Me to fü nih, wü di enga \*Yisarayele, gü ba dene, 'Me ka-ye ngbee biringbö. Ah de miri ka-nih me-ye. Kpara te fa engu nda ma. 30 Mü le Me de maguma mü 'buru. Mü o fingängü ka-mü kpah 'buru tete. Mü le ngü kaka de wazi mü kpah 'buru. Mü to te-mü kpah 'buru fefe.' Dela kpeke Riri te Me to fü nih, te fa wü bu ye 'buru. 31 E'ba'basu na gü ba dene, 'Mü le wü bu mü, baka e te mü ngbü ele küte mü.' Dela gina wü kpeke \*Riri ta te Me to fü nih. Gara riri te fa ewü dela nda ma."

14.10-11

Dene ngü te Yuda Keriyota reke, teka ato Yesu di fü wü vügü

Matayo 26:14-16, Luka 22:3-6

10 Fütanga ngü la, fü \*Yuda Keriyota, te di biri kpara esüka wü \*kpara ka Yesu nzükpa de füh ye 'basu ne, ayia anü kpaka wü mere \*kovo ka wü Yisarayele. Fü ah amala ngü fü ewü, gü ba, "Ni ena agiri kaje, te ni ena ato Yesu di fü wü." 11 Te wü mere kpara la je ngü te Keriyota mala fü ewü de bala ne, fü ngü la areke gbü jia ewü 'duwa ba-neh-ene-la. Fü ewü alügü ngü fefe na, gü ba dene, "Te ye to Yesu fü ani fanü fanü la, ani ena ato jiasa fü ye." Te di bala, fü Keriyota akpo da egiri züka kaje, te ni ena agü tamu Yesu tete fü ewü.

14.44-46

44 Angü Yuda Keriyota mala ta fü ewü, gü ba, "Ni ena agü tamu Yesu fü wü. Mene kpara te ni ena afaka, dela eyi engu. Wü zoro engu gö! anü di kpaka wü mere kpara." 45 Fü Keriyota akoro kürrü, afaka Yesu, gü ba dene, "Mere kpara, mü ladü!" 46 Fü ewü ayia 'duwa azoro Yesu.

15.6-15

6 Ta gbü wü re la, gbü mere sīkpī ka \*Pasika 'buru, Miri Pilatü ngbü ta ece kpa te gara kpara ka ku biringbö, ba e te wü di enga Yisarayele ngbü ele. 7-11 Te di bala, fü wü gara kpara ayia akoro kpaka Miri Pilatü, ayi-tata, gü ba dene, "Mere kpara, ah ena atī atī fü ye ace kpa te kpara ka ku biringbö fü

ani, kpah baka e te ye ngbü emere gbü wü sikipi ka Pasika 'buru ne?" Baka te Miri Pilatü, wu eyi, gü ba, maguma wü kovo la siti eyi eküte Yesu, fü ewü aza engu akoro di kpaka ni, teka de ni mörö engu asidi ne, fü engu ayia agiri kaje, de ni küwa Yesu tete na. Fü ah ayia amala ngü fü wü kpara la, gü ba dene, "Wü le de ni ce neh kpa te da? Te ni ce kpa te Yesu, miri ka-wü ne, ah esiti?" Te wü kpara la je ngü te Miri Pilatü mala de bala ne, fü ewü aci 'buru, amala ngü fü Miri Pilatü, gü ba, "Ani ele de ye ce kpa te Baraba engu fü ani!" Wüh mala bala kükürü de, angü wü kovo to ta ngü eyi guvu ewü gügü, gü ba, "Te Pilatü gü ba, ni le ace kpa te Yesu la, de wü ce ka-wü kpo. Wü mala fefe, gü ba, 'Ani le ka-ani Baraba engu.' " Baraba ta süka wü kpara te wüh gü gbü ku, teka te wüh ngbü emömörö wü kpara teka tö ka-wü. 12 Miri Pilatü gü ba, "Anga Yesu, de te wüh ngbü ei engu, gü ba, ah de Miri ka wü \*Yisaraye ne, ni ena amere de engu neh ene?" 13 Fü ewü aci 'buru, aba rere kpa tikpi, gü ba dene, "Wüh mörö engu amörö! Wüh bere engu eküte \*rü gbegete!" 14 Miri Pilatü gü ba, "Tekah neh? Engu kpo neh ene liya ne? Ah mere ne \*siti ngü ne?" Fü ewü adu akpo da eba rere, afa engu de tine ne ka, gü ba, "Wüh mörö engu amörö! Wüh bere engu eküte rü gbegete!"

15 Fü cürü ari te Miri Pilatü, teka mere bi wü kpara la. Fü ah adu ale ngü ka-ewü. Fü ah ayia ace kpa te Baraba fü ewü, ba e te ewü le. Fü ah adu ai wü marajümiya ka-ye de wüh süma Yesu. Fü ewü asüma Yesu de siti juru konü de biki gbü ye. Fütanga ngü la, fü Miri Pilatü adu aza Yesu, ato fü wü marajümiya ka-ye, de wüh nü, wüh bere engu eküte rü gbegete.

15.33-39

Dene ngü ka kpi ka Yesu

Matayo 27:45-56, Luka 23:44-49, Yüwane 19:28-30

33 Fütanga ngü la, ah te enü akoro etü ra, fü sü ayia ati 'duwa mbirri, baka biti la. Fü e la ayiri bala, zalü akoro gbü lö-ra bata ka tamurago. 34 Gbü lö-ra engu la, fü Yesu ayia aku gba de mere ri ye kpa tikpi, gü ba dene, "Eloyi, Eloyi, lama sabakatani?" Ah baka e te wüh gü ba dene, "Me, Mere Miri ka-ra, mü ce ra kikipi ra, neh teka ne?" 35 Wü gara kpara te ewü di kpala, wüh je ngü te Yesu mala la mbi mbi nda-wü de, fü gara ewü afi, gü ba dene, "Ah ngbü dela neh ei \*Iliya, de ah koro, ah küwa ni?" 36 Fü gara komoko ayia akpe de woro, aza e baka lifa fö'dö fö'dö bala, agü gbü fi, ato te nzö e baka gala la, aza ato te komö Yesu, de ah 'bü, gü ba dene, "E-wu neh da, anga Iliya ena akoro aküwa engu?"

37 Fü Yesu ayia aku gba kpa tikpi, ayia ace maguma ye, akpi.

38 Gbü lö-ra te Yesu kpi tete na, fü mere bongo ta te wüh i, kolo tü \*Mere Kambü ka Me agbü Yerüsalema di, baka ngisi ne, fü ah ayia asörö te-ye de tete-ye, mbaaa kü kpa tikpi ngbüüü kötö. Fü ngü la aga gbü jia wü kpara ba sirimbi.

Dela ta ngü te Yesu kpi tete na.

39 Gara mere kpara ka wü marajümiya ngbü ta eceka Yesu kpala. Te engu je gba ka Yesu bala, fü ah awu kaje te Yesu kpi tete na, fü ah agü ba, "Komoko ne, ah ka-ye de Ye Me fanü fanü."

15.42-46

Dene ngü teka kö Yesu

Matayo 27:57-61, Luka 23:50-55, Yüwane 19:38-42

42-43 Gara komoko ta ladü de iri ye \*Yüsefa kpara ka Arimatayo, te di de mere kpara esüka wü mere \*kovo ka wü Yisaraye. Ah kpah de kpara te ngbü eo jia ye teka Miri, te Me ena atima teka aküwa wü kpara ne. Sikipi de ta te Yesu kpi tete na ne, ah ka-ye ta sikipi te wü kpara ngbü ereke te-wü tete,

teka \*sikpi ka Me ka wü Yisaraye. Te di bala, etamurago la, fü Yüsefa ayia, ai maguma ye gö, anü kpaka Miri \*Pilatü, anda'ba te-ye fefe na, gü ba dene, "Mere kpara, ni le ayi-ta ye de gara ngü biringbö. Te ah ti eyi gbü jia ye la, ni ele de ye to kö Yesu fü ni, ni ti."

44 Fü Miri Pilatü adu afi nga ngü la, gü ba dene, "Yesu mere ngü ye, adu akpi kece neh fe?" Fü Miri Pilatü ayia ai mere kpara ka wü marajümiya ka-ye, ayi-tata, gü ba dene, "Yesu kpi eyi fanü?" 45 Komoko la ga, "Wayi, ah kpi eyi fanü." Te Miri Pilatü je ngü la bala, fü ah ayia ale ngü ka Yüsefa, ato kö Yesu fefe.

46 Fü Yüsefa ayia anü ase züka bu bongo, akoro di. Fü ah adu aza kö Yesu eküte \*rü gbegete asidi, adu agaga de bu bongo la. Fü ah anü de kö Yesu, ati agbü gara gö da, te wüh jì sere sere bane, angü gele ka wü \*Yisaraye ta bala. Fü ah awara mere ngbürikü da, ao emö nga mbükü la, ani di.

#### 16.1-7

Dene ngü te mere te-ye kpa füh mbükü Yesu

Matayo 28:1-8, Luka 24:1-8, Yüwane 20:1-12

1 Kpurutokokpi la, wü kpara 'buru ngbü efe te-wü, angü ah de \*sikpi ka Me. Etamurago la, te ra ti tete na, \*sikpi ka Me nza eyi. Te di bala, fü \*Mariya Egba-Magadala ayia de wü Salüme, bete \*Mariya ni ye Yakobo, ayia anü ase \*züka se-mü, teka amoko eküte kö Yesu.

2 Gügü kpurutokokpi, fü ewü ayia anü kpa füh mbükü. 3 Te wüh ngbü enü tete na, fü ewü angbü emala ngü esüka wü, gü ba dene, "Anga mere siti da, te wüh ni mö mbükü la di ne, ani ena amere di, neh baye? Kpara te ena anzi da la asidi neh da, teka fü ani arí kpala?" 4 Fü ewü anü akoro kpa füh mbükü la, aceka kpi, yirri! Da, ta te wüh o emö mbükü ne, wüh nzi eyi asidi!

5 Fü ewü ayia arí agbü gö da, te wüh ti Yesu gbügbü na ne. Gbo! te gara jaji komoko de züka bu bongo te ye, te ngbü gbü mbükü kpala gbü kokpa. Fü cürü arí te ewü 'duwa ba-neh-ene-la. 6 Fü jaji komoko la ayia amala ngü fü ewü, gü ba dene, "Yi kpe cürü de. Ma wu eyi, gü ba, yi ngbü egiri Yesu, kpara te wüh bere engu te \*rü gbegete ne. Ah zükü eyi. Yi ceka la sanga, ta te wüh o kökö gbügbü na ne. Engu sene ma! 7 Yi du edu, yi mala ngü la fü wü Petero de wü bu ye, gü ba dene, 'Yesu zükü eyi! Ah nü sü eyi kpa engagira nü agbü \*Galilaya. Wüh nü enü, fü ewü amaka engu kpala, kpah ba ngü ta te engu mala fü ewü ne.' "

#### 16.15-16

15 Fü Yesu adu arü amala gara ngü fü ewü, gü ba dene, "Yi nü, yi baya te nga sü füh kotö ne 'buru, de yi mala ngari ra fü wü kpara 'buru nde. 16 Mene kpara te to maguma ye fere, de yi to \*babatiza fefe na, fü Me aküwa engu. Mene kpara te le ngü ka-ra la de, ah küwa kpah de.

#### 16.19-20

19 Fütanga ngü la, fü Me ayia aza Yesu, ago di agbü sü ka-ye, agbü kpi. Fü Yesu angbü kpala gbü kokpa ka Me. 20 Te wü \*kpara ka Yesu je ngü te engu mala fü ewü la, fü ewü ayia abaya te nga wü sü 'buru, angbü da emala ngü ka Yesu fü wü kpara 'buru nde. Fü Miri Yesu angbü da eto wazi fü ewü teka tima ka-ye la. Fü ah angbü kpah eto wazi fü ewü, de wüh ngbü emere wü mere tiri ngü ka talara di, teka fü wü kpara awu, gü ba, "Ngü ka Yesu, te ewü ngbü emala la, ah ka-ye de zu ngü fanü fanü."

Dela ngü teka Yesu \*Kurisito, Ye Me. Adudu na bala.